

Mhadut hndayu

“Baruy, usa, sai mhadut ka hndayu nii, gaga qmpah daya hiya ka tama, dhqan su ka paru qhuni dara do, sai mkala ni usa ttama babaw tasil paru hiya pbaraq mjiras bitaq msiyuk ka tama do kika tndu da, ini biyaw empsriyu tmabuy ka tama, mkla su da?” msa ka bubu.

Empitu hngkwasan laqi kuyuh ka Baruy, mnegqaras ni mnegeuyas bi ka hiya, mkmdayaw bi bubu ka hiya, yaa hmuya pini, ini hari skeagul hyaan mmkay ka bubu, jiyax sayang, yaa hmuya pini, usa msa ka bubu do, asi sa “Iq wa!” ka Baruy da!

Ayug gaga pusu qhuni dara hiya o mnlala musa ka Baruy da, kiya ka kiya ni stguhuy mnswayi musa ha, wana pxal nii ka hiya nanak musa.

Mapa brunguy tnqrian bubu ka Baruy, ga kska brunguy hiya ka idaw bunga, paji qulung ni bgu rudux, malu bi knux na, kndeadax paah sapah ka Baruy siida, “Dhqun su mapa ka brunguy nii hug?” msa ka bubu, “Dhqun mu!” msa smiyuk ka Baruy.

“Ma ku lu ini kla kida!” msa ni bukaw bukaw wada mksa elug daya, bi knhuway ni mkleelug dmhaw klaway ni qbhni, bi meuyas ni mkleelug lmamu hiyi qhuni yabas, mabal bsiyaw qmiluq mkan, strngan na ka payi

gtgut, “Baruy, mowsa su inu?” “Mowsa ku mhadut hndayu tama mu.”

strngan na ka baki gtgut, “Baruy, mowsa su inu?” “Mowsa ku ayug ribaq hiya, mhadut hndayu tama mu!”

Kdax bi ska hidaw, hnhana dhuq paru qhuni dara, bqaray na dxgal ka brunguy, mkala ttama babaw tasil paru, qtaan na kla sa gaga mtqiri siyaw na kana ka dgiyaq, tgkeinu ka daya qmpahan tama hug? msa lmnlung ka hiya, wana kari bubu ka lnglungun na ni asi pquri dgiyaq tmribu hyaan tqiri pbaraq mjiras ka hiya, “wau~wau~” “wau~wau~” bitaq tblnga kana ka ayug.

Mnlala ka pnbaraq na mjiras da, hrhir ka phgut na da, mnqhnga ka lnglungan na uri da, meuwit da ni rubang emplingis do, wau~wau~, niqan hnang smiyuk paah gaing, asi tutuy ni pbaraq mjiras duri ka Baruy, ini biyaw nii tmabuy paah daya ka tama, “Nii su da!” msa ka tama, mrahul pusu qhuni mkan nhapuy ka dhiya, mhulis rmngaw ka tama, “Pnaah inu ka rusuq dowriq dqras su gaga? Pnaah inu uri ka idaw dqras su gaga?” Asi tblnga kana ayug ka hnang hulis ni hnang tqqaras!

送飯記

「Baruy，去送便當給爸爸，走到大茄冬樹時，到大石上喊到爸爸回應，爸爸就會下山了，知道嗎？」媽媽說。

Baruy 去過很多次，但未曾自行前往。Baruy 揹著竹簍，裡頭有地瓜飯、龍葵和雞湯，終於到樹下，爬上大石，她看著群山，爸爸的田地在哪呢？她大喊：「哇嗚~哇嗚~」「哇嗚~哇嗚~」直到山谷傳來回音。很快地爸爸下山了，「妳到囉！」爸爸說。他們在樹下吃飯，爸爸笑著說：「妳臉上的眼淚跟飯粒是哪來的呢？」山谷充滿笑聲！